



15.02.2022

UPA2022/58

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Kalaallit Nunaata kangiani Tasilami nunaqarfiinilu, kiisalu Ittoqqoortoormiini aalisarnikkut ikaarsaariartornermi immikkut aalisarnikkut allatigullu inuussutissarsiornikkut siuarsaalluni aningaasalersuisoqarnissaata pilersinneqarnissaa eqqarsaatigalugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Emanuel Nûko Naleraq)

### **Tunngavilersuut:**

Nunatta Kangiani Tunumi aalisarnikkut ikaarsaariartornermi immikkut aningaasalersuinissamik pilersitsinissaq pisariaqarpoq, aalisarnermut ikaarsaariartornermi umiatsianik aalisariutinillu nutarsaanissaq pisariaqartorujussuuvoq, umiatsiaaqqamik aalisartut umiatsiatik mikigileraluttuinnarpaat silaannaap allanngoriartornera, aammalu aalisarfiit amerlanerusut tikinneqarlutik atorluarneqassappata aalisariutit anginerusut pinngitsoorneqarsinnaajunnaariartormata.

Aalisarnermut ikaarsaariartorneq kangiani Tasiilami eqqaanilu takussaagaluttuinnarpoq. Tunumi immikkut ittumik pilersitsinissaq pissusissamisoorpoq, inuiaqatigiinni aalisartuni aalisarnikkut aalisariuteqarnikkullu pitsaanerusumik atugassaqartitsilernissaq eqqarsaatigalugu.

Umiatsiaararsornermi periarfissaat annikilligaluttuinnarput, tamannalu siuarsaanikkut allanngortittariaqalerpoq aamma aalisarnikkut inuussutissarsiuteqarneq siuarsarneqassappat.

Ukiuni makkunani pinngortitap allanngornera pissutaalluni, silarluttarnera ilaatigullu anorit sakkortusiartuinnartut eqqarsaatigalugit aalisartortatta aalisartunngortussallu ullutsinni tulluarnerusunik aalisariutaasinnaasunik peqalernissaat periarfissinnissaallu pissusissamisoortutut isigaarput.



# Naleraq

Kangiani Ittoqqortoormiini Tasiilami eqqaanilu periarfissat aalisarnikkut annikitsuararsuupput tunitsivillu ataasiinnaalluni tassalu tunitsivik Kuummiuniittoq, umiatsiaararsornikkullu inuussutissarsiortut silarluttalersillugu periarfissaaruttarnerat takornartaanngilaq, tamannalu taamatut inuuniuteqartunut ernumalersitsisarpoq ilaatigummi inuussutissarsiortat ullorpassuarni uninngasarpoq tunitsivissaqarnikkut aallatigullu periarfissaqanngivinnek pissutaalluni. Ilaqtariit aalisartukkormiut piniartullu inuuniarnerannut tunitsivissaqannginneq imminut napatinnerulernissamut periarfissaluttorujussuovoq inuillu amerlasuut aamma suliffissaaleqisarnerannut tamanna pissutaalluinnartoq nalunngilarput.

Pissutsit taakkartorneqartut pitsaanerulissappata aalisarnikkut suliffissaqarnikkullu siuarsaanissaq Tunumi saneqqunneqarsinnaanngilaq, tassami allamik periarfissaqanngilaq tamaallaat aningaasalersuinikkut pissutsit pitsaanerulernissaat nutaamik aqputissiuuttariaqalerparput. Namminersorlutik oqartussat allanik aamma suleqateqarnissaat pinngitsoorneqarsinnaanngilaq suliffeqarfiit namminersortut aalisarnermi ingerlatsisut aamma suleqatigineqartariaqarput aamma aalisarnikkut misileraanissat eqqarsaatigalugit.

Minnerunngitsumillu aamma kommuni siuarsaanissami suleqataanissaa avaqqunneqarsinnaanngilaq, taamaattumik neriulluarpugut pissutsit pitsaanerulersissagutsigit atatsimoorluta nukigut kattuttariaqarigut. Tunumi aalisarfiit amerlanerusut tunitsiviillu pitsaanerulissappata pissutsit massakkut atuuttut allanngortilluinnartariaqalerput aalisarnikkut siuarsaanissaq suliffissaqartitsinissarlu pitsaanerulissappata aningaasalersuinissaq saneqqunneqarsinnaanngilaq.

Nunarput tamaat isigalugu inuussutissarsiornikkut tapiiffigitittarnermi Ittoqqortoormiini Tasiilami eqqaanilu najugalinnut annikitsumik periarfissaasarpoq isertitat apeqqutaallutik. Taamaattumik aningaasalersuineq nutaaq pilersinneqarpat aalisartortagut piniartortagullu periarfissaarnerulissapput umiatsiaarartaarnissaminnut anginerusunillu angallataarnissaminnut. Kiisalu aalisarnek siuarsarneqassappat pinngitsoorneqarsinnaanngillat aalisakkanut tunitsiviit pilersinnissaat. Tamannalu ilanngullugu eqqarsaatigisariaqarpoq. Tunumi suliffissaaleqineq annertoqaaq, taamaattumik tunitsivissat eqqarsaatigalugit nutaanik periarfissanik aallartitsinissaq sulissutigisariaqalerparput.



Ilanngullugu eqqarsaatigisariaqalerparput Ittoqqortoormiit Kangerlussuat nunarsuarmi kangerluit isorartunersaat aalisagaqassutsikkut misissuiffigineqarnissaa aallartitariaqalermat. Tassami qularnanngivippoq kangerlussuaq taamak isorartutigisoq misissuiffigilluarneqaruni aalisarfiit nutaat nassaarineqarsinnaammata tamannalu anguneqarpat inuuniarnikkut atukkat aningaasarsiornikkullu periarfissat pitsaanerulernissaat qularnanngilluinnarmat.

Aalisarnikkut siuarsaasoqassappat pinngitsoorneqarsinnaanngilaq aalisarnikkut aammalu aalisarnermi atortut eqqarsaatigalugit inuusuttunik aalisartunngorniartunik pikkorissaanerit pinngitsoorneqarsinnaanngimmat ingerlatissallugit. Tassanilu imarsiordermi ilinniarfik pinngitsoorneqarsinnaanngilaq, soorunami aalisartut kattuuffii suleqatigilluarneqartariaqarput siuarsaanerit aningaasalersuinissallu eqqarsaatigalugit qularnanngimmat siunnersuinerikkut ikiuulluarnissaat pinngitsoorneqarsinnaanngimmat.

Aalisarnermut nutaami ikaarsaariartordermi nutaamik aningaasalersuinermi inuaqatigiinnut siunissami iluaqutaangaatsiassaaq inuussutissarsiutit nutaat aallartinneqartussaammata. Inuaqatigiinni Tunumi suliffissaaleqineq annertuvoq. Periarfissat aalisarnikkut annikimmata inuaqatigiit aalisartut aalisartunngorumaartussallu pitsaanerusumik toqqagassaqalernissaat periarfissaqalissaaq. Siunissaq qaninnerusoq ungasinnerusorlu eqqarsaatigalugit aalisarnikkut siuarsaaqqinnissamik suliffissaqarnerulernemillu pilersitsinissaq inuaqatigiinnut peqqinnartumik Tunumi aallartitsisuussaaq. Oqallilluarisi.